

I N F O R M A C I J A

o radu za prvih 100 dana mandata

1. UVOD

Nakon provedenih oktobarskih lokalnih izbora i potvrde konačnih rezultata od strane Centralne izborne komisije, izabran sam za novog načelnika Općine Goražde, a dužnost sam preuzeo nakon primopredaje 19.11.2008. godine, dok je konstituirajuća sjednica Općinskog vijeća Goražde održana 05.12.2008. godine.

Obzirom da sam u svom predizbornom programu naveo i viziju svoga rada u mandatnom periodu, koja je podijeljena u nekoliko faza, od kojih je prva analiza postojećeg stanja i priprema programa rada, te ću shodno tome, izvršenoj primopredaji i pregledu zatečenog stanja, kao i aktivnostima koje sam u ovom kratkom periodu poduzeo, pokušati u najkraćim crtama da Vas informišem o aktuelnom stanju i eventualnim poteškoćama i problemima koji u ovom momentu postoje i koje ćemo svakako nastojati što prije otkloniti na opšte dobro svih, ne ulazeći u suštinu i stvarne razloge koji su doveli do ovakvog stanja.

Dolaskom na funkciju Načelnika u početku zatekao sam brojne probleme kao što su dug prema Direkciji cesta F BiH, blokada računa, problem sa odlaganjem smeća, Malom pijacom i drugim problemima koji su nastali neodržavanjem sjednice Općinskog vijeća Goražde od jula 2008.

Ovo su svakako samo od nekih uočenih poteškoća, a one aktivnosti i probleme koji se operativno rješavaju svakodnevno neću elaborirati u ovom izvještaju, jer njih zajedno sa saradnicima analiziram i rješavam na redovnim sastancima.

PRAVNI OSNOV I SARADNJA SA OPĆINSKIM VIJEĆEM GORAŽDE

U svom četverogodišnjem mandatnom periodu 2009. – 2012. godina, sve planirane i u predizornoj kampanji, obećane aktivnosti, a u skladu sa svojom programskom platformom, realiziraću u skladu sa svim važećim zakonskim okvirima koji daju pravni osnov za djelovanje u domenu lokalne zajednice Općine Goražde. Zakoni i dokumenti u skladu s kojima ću nastojati implementirati zacrtane projektne aktivnosti su slijedeći: Ustav države BiH, Ustav F BiH, Ustav BPK – a, Zakon o principima lokalne samouprave u F BiH (Službene novine broj: 49 / '06), Zakon o bužetima u F BiH (Službene novine F BiH, broj: 19 / '06) , Statut Općine Goražde (Službene novine BPK, broj:13 / '07), Poslovnik o radu Općinskog vijeća Općine Goražde (Službene novine Općine Goražde, broj: 2 / '08), ISO standardima koji podrazumjevaju djelovanje u skladu sa utvrđenom i definisanom Misijom, Vizijom i Politikom kvaliteta ISO 9001 – 2000, Strategijom razvoja Općine Goražde zasnovane na poštivanju ljudskih prava 2008. – 2014. godina, kao i svim drugim strateškim dokumentima kojima se daju osnovne odrednice i smjernice kretanja i razvoja u određenim pojedinačnim oblastima.

Sa Općinskim vijećem Goražde do sada smo ostvarili prilično dobru saradnju i uvažavanje, a u planu je da i dalje ostane tako. Do sada je održano 5 redovnih sjednica na kojima smo razmatrali i prokrenuli brojna pitanja, inicijative i poduzeli mnoge aktivnosti.

PODUZETE AKTIVNOSTI / PROJEKTI

U proteklih 100 dana Općina Goražde provela je niz aktivnosti i projekata, nastavljena je realizacija započelih, ali krenulo se i u realizaciju novih projekata. Neke od projekata koje ćemo posebno istaknuti su:

GAP II

Nastavljene su aktivnosti na projektu **GAP II** (priprema i implementacija 6 projekata u naredne 3 godine) koji su od velikog značaja za našu jedinicu lokalne samouprave a koji su skladu sa Strategijom razvoja zasnovanoj na poštivanju ljudskih prava 2008-2014. Projekti koje će Općina realizovati kroz GAP II su:

1. Promocija lokacije –izrada plana privlačenja investicija,
2. Priprema i provedba lokalnog ekološkog akcionog plana (LEAP),
3. Uvod u program Instrument za pretpristupnu pomoć (IPA),
4. Umrežavanje mjesnih ureda sa Centrom za pružanje usluga građanima,
5. Skeniranje i digitalizacija dokumenata, razvoj elektronske biblioteke,
6. Elektronsko izdavanje dozvola – Integrisani sistem (Model 3).

Kroz implementaciju pomenutih projekata u narednom periodu nastoji se naročito poboljšati sistem usluga i rada organa uprave, izvršiti elektronsko uvezivanje sa mjesnim uredima, izvršiti uvođenje novih softverskih aplikacija u rad, čime će se uveliko unaprijediti način rada i poboljšati efikasnost usluga.

OSCE

Nastavljen je projekat reorganizacije općinskih službi za upravu, koji se realizuje u saradnji sa **OSCE-om**. Cilj ovih projektnih aktivnosti je usmjeren u pravcu racionalizacije, profesionalizacije i pospješenja principa efikasnosti i funkcionalnosti službi za upravu Općine Goražde, a u skladu sa standardima EU u domenu funkcionalnosti lokalne zajednice.

UNDP

Općina Goražde u saradnji sa **UNDP-om / UDRDP** zajedno sa ostalim općinama sa područja Gornje-drinske regije učestvuje u implementaciji projekata koji su obuhvaćeni Programom razvoja Gornje-drinske regije, koji za cilj imaju:

- institucionalizaciju dobre uprave,
- revitalizaciju lokalne ekonomije,
- rehabilitaciju javne strukture

Od niza projekata koji se implementiraju kroz ovaj program, spomenut će svakako jedan od najvažnijih koji se trenutno realizuje, a to je izgradnja vodovoda "Starac" i sanacija vodovodne sekundarne mreže. Izgradnjom ovog vodovoda riješit će se vodosnadbjevanje 5 MZ na čijem području živi oko 3000 stanovnika (Sadba,

Osanica, Vranići, Mravinjac i Vitkovići). Tu su i projekti iz oblasti poljoprivrednih djelatnosti (pomoć u razvoju stočarstva, poljoprivredne proizvodnje), edukacije i druge aktivnosti.

Također je nastavljena realizacija UNDP-ov projekta "Plod SUTRA" kroz koji se realizuje i projekat izgradnje zgrade DOM 2. Vrijednost projekta je 1.300.000 KM. Projekat će pored Općine Goražde finansirati UNDP, ministarstva izbjeglica FBiH, Sarajevskog i BPK-a Goražde. Riječ je o izgradnji zgrade sa 25 stambenih jedinica, namjenjenih porodicama čiji su stanovi porušeni u toku rata. U Općini Goražde postoji velika potreba za ulaganjem u razvoj poljoprivredne proizvodnje, mljekarstva, te će Općina prema UDRDP-u u narednom periodu aplicirati sa nekoliko projekata za opremanje otkupnih stanica laktofrizima i ostalom neophodnom opremom, a predstavnici UDRDP-a najavili su brojne projekte za naredni period, koji će pored pomoći individualnim poljoprivrednim proizvođačima i farmerima, uključivati i projekte podsticaja proizvodnje humusa, projektima iz oblasti zaštite na radu, brojnih edukacija.

SERDA

Općina kao jedna od članica Sarajevske ekonomske razvojne agencije SERDE također radi na nastavku ranije započetih aktivnosti na izgradnji regionalne sanitarne deponije, kao jednog od gorućih problema naše lokalne zajednice. Goražde kao jedna od potencijalnih lokacija za izgradnju deponije (pored Čajniča i Rudog), pored rješavanja pitanja odlaganja smeća, dobila bi mogućnost otvaranja novih radnih mjesta (oko 50 radnika) a pored zapošljavanja deponija bi donosila i ekonomsku korist za lokalno stanovništvo. Riječ je o ulaganjima u iznosu 6 000 000 \$.

Također su započete aktivnosti na pitanju rješavanja gasifikacije grada. Naime, u organizaciji Sarajevske ekonomske razvojne agencije SERDA 23.12.2008. u Sarajevu je održan sastanak kojem su pored načelnika općina Goražde, Pale i Pale-Prača, prisustvovali i predstavnici BH Gasa "Sarajevogasa" i IGM-a, kao i opština RS ove regije. Sastanak je organiziran s ciljem prezentiranja idejnog projekta izgradnje plinovoda od Sarajeva do Goražda, a za njegovu izgradnju, neophodno je obezbjediti sredstva u iznosu 45 miliona maraka. Postoji veliko interesovanje da se plin dovede i na Jahorinu i Pale, a istovremeno da ovim projektom bude obuhvaćeno i Goražde.

IFAD I ODRAZ

Općina Goražde također je nastavila dobru saradnju sa Međunarodnim fondom za poljoprivredni razvoj (IFAD) i Fondacijom za održivi razvoj (ODRAZ), te radi na projektima razvoja poljoprivrede, obnove i izgradnje infrastrukture. Jedan od projekata koji treba da se realizuje u saradnji sa ODRAZ-om jeste i projekat sanacije grijanja i ventilacije u Gradskoj dvorani.

SAVEZ OPĆINA I GRADOVA FBiH

Kao Načelnik Općine Goražde, nedavno sam izabran za člana Predsjedništva Saveza Općina i gradova F BiH (SOGFiH), i aktivni sam član, te sam u proteklih 100 dana aktivno učestvovao u radu Saveza koji je pokrenuo niz aktivnosti i projekata koji za cilj imaju razvoj lokalne samouprave, unapređenje rada i zaštitu interesa jedinica lokalne samouprave. Danas Savez broji 78 jedinica lokalne samouprave od 80 postojećih u Federaciji BiH.

IFC

Odnedavno se krenulo u realizaciju jednog novog projekta u saradnji sa Međunarodnom finansijskom Koorporacijom (IFC) koja je dio grupacije Svjetske banke u Bosni i Hercegovini, i koja provodi Projekat regulatorne reforme na općinskom nivou u BiH (tzv. "Giljotina propisa "), kako bi se pojednostavile uprave strukture i otklonile poteškoće koje se shodno tome odražavaju na poslovno okruženje. Vrijednost projekta je 105 000 KM.

Projekat će trajati nekoliko mjeseci i odvijat će se u više faza, a krajnji cilj jeste analiza trenutnog stanja kada su u pitanju administrativne procedure u ovoj, te davanje smjernica i preporuka u provođenju istih, kao i smanjivanje političkih, administrativnih troškova, brza eliminacija velikog broja nepotrebnih pravila i samim tim poboljšanje kvaliteta usluga prema građanima.

GVC

Nevladina oganizacija GVC iz Bolonje (Italija) uskoro na području Općine Goražde kreće sa realizacijom projekta "Alternativne mjere institucionalizacije maloljetnih lica bez roditeljskog staranja i podrška maloljetnim licima i mladima u poteškoći".

Projekat će trajati 3 godine, a realizirat će se upravo zahvaljujući predstavnicima GVC-a, predstavnicima Općine Goražde i MZ-a, a u samu implementaciju uključena je i nevladina organizacija "Anima N" iz Goražda. Projekat se sastoji od nekoliko značajnih segmenata, a u sklopu projekta, između ostalog, otvorit će se internet centar, biblioteka i drugi sadržaji za mlade, a biće organizovano i niz edukacija za mlade.

GVC pored Goražda svoje aktivnosti realizuje i na području Srebrenice, Doboja i Gradačca, a ukupna vrijednost svih projekata na području ovih općina iznosi više od 500 000 eura.

WORLD VISION

Humanitarna organizacija World Vision u proteklom periodu uspješno je realizovala niz projekata na području BiH. U narednom periodu ova organizacija odlučila je usmjeriti finansijska sredstva u izabrane lokalne zajednice, kako bi se povećala uspješnost realizovanih projekata.

World Vision je zainteresovan da u svoje projekte uključi i Općinu Goražde, te namjerava realizovati više projekata (naročito projekte koji se tiču djece i mladih) na području Općine Goražde. Zanimljivo je da za razliku do većine drugih organizacija, World Vision na području jedne lokalne zajednice djeluje 10 godina.

Općina Goražde će pružiti svu pomoć i saradnju World Visionu, jer kroz realizaciju pomenutih projekata u narednih 10 godina, Općina će ostvariti značajne rezultate i napredak.

SAVE THE CHILDREN

U Sarajevu se u periodu od 12.-13. marta 2009. odražala Međunarodna konferencija na temu "Indeks inkluzivnosti u obrazovnom sistemu - integracija i replikacija indeksa inkluzivnosti u lokalnim zajednicama u BiH" koju je Save the Children UK organizovao u okviru projekta "Inkluzivno obrazovanje - provođenje nacionalnih strategija i politika u praksi na lokalnom nivou", a koji je finansijski podržan od strane Irske Vlade, a u okviru inicijative "Inkluzivne škole-inkluzivne zajednice" u saradnji sa OSCE-om, Save the Children Norway i USAID-om. Inicijativa se realizuje u 29 lokalnih zajednica u BiH u saradnji sa predstavnicima ministarstva obrazovanja, pedagoških zavoda i opština.

Indeks inkluzivnosti predstavlja metodologiju koja pomaže školama da unaprijede inkluzivnu kulturu, politiku i praksu u školi i na taj način omogući veći pristup i kvalitet obrazovanja, naročito marginalizovanih grupa djece, kroz jačanje saradnje škole i lokalnih zajednica u rješavanju pitanja prevazilaženja prepreka u obrazovanju djece.

Cilj konferencije je razmjena dosadašnjih iskustava škola u primjeni indeksa inkluzivnosti za kreiranje opštinskih planova akcije za unaprijeđenje inkluzivnog obrazovanja i definisanja modela mehanizama koji će dugoročno omogućiti angažovanje svih nivoa vlasti i članova lokalnih zajednica za unaprijeđenje kvalitetnog inkluzivnog obrazovanja djece u svim opštinama BiH.

Učesnici konferencije bili su predstavnici vladinog i nevladinog sektora, univerziteta, kao i predstavnici civilnog društva, međunarodnih institucija, organizacija i donatora. Učešće u ovoj konferenciji uzeli su i predstavnici Općine Goražde tj. Načelnik Općine Goražde, te Nedim Krajišnik, Jasmina Djana i Vildana Trbović koji učestvuju u realizaciji ovog projekta na području Općine Goražde.

Sa organizacijom Save the children uspostavljena je dobra saradnja, a ista će se i dalje nastaviti.

PROTOKOLARNE AKTIVNOSTI

U početku mandata, a u sklopu protokolarnih aktivnosti održani su sastanci sa brojnim predstavnicima i zvaničnicima iz javnog, kulturnog i političkog života, nevladinih udruženja, sportskih radnika i kolektiva. Prvi u nizu sastanaka održani su sa predstavnicima GAP-a, OSCE-a, UNDP-a, LOT tima. U prvih mjesec dana mandata održan je i zajednički sastanak sa svim načelnicima regije, kako bi se ponovo pokrenule ranije započete inicijative izgradnje regionalne sanitarne deponije, kao i drugih projekata.

POSJETE ZVANIČNIKA

Posjeta ambasadora Slovačke u BiH Miroslava Mojžite

Europski pokret u Bosni i Hercegovini (EP) i Načelnik Općine Goražde, u okviru projekta koji je podržan od Ambasade Republike Mađarske, bili su organizatori javne tribine na temu: "Bogatstvo različitosti BiH-kapital i zalag zajedničkoj europskoj budućnosti", koja je održana 23.02.2009. u Maloj Sali Centra za kulturu Goražde. Prije same tribine održan je i zvanični sastanak u Općini Goražde, a pored ambasadora Slovačke republike Nj.E. Miroslava Mojžite, sastanku sa načelnikom i saradnicima, prisustvovali su i Predrag Praštalo, generalni sekretar EP u BiH i Zekerijah Smajić. Razgovarano je o samoj ideji EP, o tome koliko on može uticati na približavanje BiH EU, razvoju i napredku Slovačke, te njenom članstvu u EU, ali i mogućim oblicima saradnje i bratimljenja Općine Goražde sa nekom od općina u Slovačkoj. Naime, EP ponudio je Goraždu članstvo u ovoj zajednici, a isto će biti potvrđeno odobravanjem potpisivanja Memoranduma o razumjevanju sa EP. Time će Goražde postati jedan od 15 gradova ovog pokreta, a osnovna ideja ovog pokreta jeste stvaranje evropskog lobija u BiH, te njeno približavanje Europskoj uniji.

Na sastanku je razgovarano o mogućnostima uspostavljanja privredne saradnje Goražda i općina u Slovačkoj Republici, ali je dogovorena i realizacija nekih manjih projekata (u vrijednosti do 10 000 KM), a koji će biti podržani od strane Slovačke ambasade u BiH, te će Općina odmah aplicirati sa dva manja projekta.

Posjeta Ambasadora Srbije u BiH Grujice Spasovića

Ambasador Srbije u Bosni i Hercegovini Nj.E. Grujica Spasović posjetio je 10.03.2009. Općinu Goražde gdje se susreo sa Načelnikom Općine Goražde i njegovim saradnicima. Sastanku je prisustvovao i Boro Sadovski, ispred Srpskog građanskog vijeća - Pokret za ravnopravnost Goražde.

Naime, ova posjeta inicirana je zvaničnim pismom kojeg je Općina Goražde nedavno uputila prema svim ambasadama, koje djeluju u Bosni i Hercegovini, u kojem ih poziva na međusobnu saradnju. Tako je prva u nizu ovih posjeta uslijedila od strane ambasadora Srbije.

Ovaj sastanak bio je prilika da se razgovara o mogućim oblicima saradnje Općine Goražde i ambasade Srbije u BiH, a naročito je naglašena mogućnost uspostavljanja saradnje na privrednom, kulturnom i lokalnom nivou.

U toku razgovora sa Načelnikom Općine i njegovim saradnicima, te predsjednikom SGV GPR-a Borom Sadovskim, ambasador je podsjetio na otvorenu ponudu srbijanskih zvaničnika za uspostavljanje specijalnih odnosa i sa FBiH, te najavio potpisivanje sporazuma o ekonomskim odnosima BiH i Srbije do kraja mjeseca.

Posjeta Ministra za ljudska prava i izbjeglice BiH Safeta Halilovića

Općinu Goražde posjetio je i Ministar za ljudska prava i izbjeglice BiH Safet Halilović, a u delegaciji su bili i predstavnici Parlamentarne skupštine BiH i Parlamenta Federacije BiH. Razlog ove posjete bio je da se pred kraj kalendarske godine rezimiraju aktivnosti koje je ovo Ministarstvo realizovalo na području Općine Goražde tokom 2008. godine, kao i da uvidi kakvo je trenutno stanje i koje su potrebe povratničke populacije, kako bi se za 2009. godinu na vrijeme planirala sredstva. Ministar Halilović je najavio da će u 2009. godini biti izdvojeno znatno više sredstava sa naglaskom na pomoć u samoodrživom povratku. On je istakao kako je dosta toga urađeno, ali da još 47 000 porodica čeka na povratak u BiH, dok kada je riječ o Općini Goražde taj broj iznosi 827 porodica. Ono što je dogovoreno ovom prilikom jeste da Općina Goražde aplicira sa projektima koji se odnose prije svega na samoodrživi povratak, a iz Ministarstva su dali obećanje da će podržati te projekte. Također su na prijedlog Načelnika iz Ministarstva obećali interventno djelovati, te su za Općinu Goražde odobrena sredstva u iznosu 75 000 KM (40 000 KM sanacija klizišta u Bisernoj i 35 000 KM za most na Sadbi).

Vlada BPK-a Goražde

Premijer BPK-a Goražde Nazif Uruči i resorni ministri, posjetili su u januaru 2009. Općinu Goražde i prilikom te posjete razgovarano je o trenutnim aktivnostima u Općini Goražde, ali i gorućim problemima.

Premijer Uruči na početku sastanka istakao je kako očekuje dobru saradnju sa ovom lokalnom zajednicom u narednom periodu, naročito zbog predstojeće globalne ekonomske krize. Kako je u toku izrada kantonalnog Budžeta za 2009, najavljeno je da će zbog globalne ekonomske krize, finansiranje iz Bužeta Kantona biti ograničeno na prioritete i u skladu sa mogućnostima, te kako će biti neophodno racionalno korištenje sredstava.

Razgovarano je i o problemima poput izgradnje regionalne deponije smeća, pitanjima izgradnje zatvora za žene, problemima sa kojima se susreće JKP "6 mart", ali i projektima poput "Brze ceste" i sl. Na kraju ove posjete zaključeno je kako će se u narednom periodu ovakvi sastanci održavati jednom mjesečno, kako bi se sumirali rezultati, te eventualno otklonule poteškoće u njihovoj realizaciji, a sve u cilju nastavka dobre saradnje kantonalnih i općinskih vlasti.

Pored ovog nedavno je sa predstavnicima Vlade BPK-a održan još jedan sastanak na kome je razgovarano o definisanja statusa potkrovnih stanova.

Načelnik Općine Centar Dževad Bećirović

U znak dobre saradnje i prijateljskih odnosa Općine Centar Sarajevo i Općine Goražde, kao i želje da se ta saradnja nastavi i ubuduće, 04.12.2008. u posjeti Općini Goražde boravila je delegacija Općine Centar predvođena Načelnikom Dževadom Bećirovićem i njegovim pomoćnicima Sijarić Sulejmanom i Adilom Katicom. Tom prilikom Načelnik Bećirović je kazao da je Općina Centar Sarajevo sa Općinom Goražde do sada imala jako dobru saradnju, što je rezultiralo značajnom podrškom Općine Centar ovoj lokalnoj zajednici. Općina Centar je u nekoliko navrata finansijski podržala razne projekte na području Općine Goražde, a jedan u nizu takvih projekata bio je pomoć u radu Doma za stara i iznemogla lica Goražde.

Tako je i prilikom ove posjete saopšteno da će Općina Centar interventno djelovati sa 20 000 KM za Općinu Goražde, a sredstva su namijenjena za sanaciju klizišta u Laletima i Parganima.

Načelnik Općine Gradačac Fadil Imširović

Našu Općinu 06.03.2009. posjetila je delegacija Općine Gradačac, koju su činili Načelnik Fadil Imširović, zastupnik u Federalnom Parlamentu Hajrudin Mehanović te Senad Vuković, pomoćnik načelnika Općine Gradačac za privredne djelatnosti.

Tom sastanku također je prisustvovao i direktor privredno-kulturne manifestacije "Dani Jabuke" Goražde, Mirsad Hubanić. Razgovarano je o uspostavljanju saradnje i zajedničkim projektima na području privrede, kulture, sporta, kao i organizaciji manifestacija Dani Jabuke i Sajam šljive u Gradačcu. Ovom prilikom dat je i prijedlog da uskoro ove dvije općine potpišu i Memorandum o saradnji.

Cilj sastanka bio je poziv na zajedničku saradnju i razmjenu iskustava u narednom periodu, a Načelnik Općine Gradačca uputio je zvaničan poziv da predstavnici Općine Goražde uskoro posjete Gradačac.

Načelnik Opštine Foča Zdravko Krsmanović

Prva zvanična posjeta i radni sastanak sa Načelnikom Opštine Foča Zdravkom Krsmanovićem održana je u januaru 2009. u zgradi Općine Goražde.

U toku sastanka razgovarano je o izgradnji regionalne sanitarne deponije, i o zajedničkom nastupu ove dvije općine prema sredstvima EU, kada su u pitanju IPA fondovi tj. projekti prekogranične saradnje za koja su također odobrena sredstva, te će ove dvije općine u saradnji sa općinama iz Srbije, Crne Gore i Hrvatske, aplicirati sa nekoliko projekata i nadaju se dobrim rezultatima.

Na sastanku je data inicijativa da bi bilo dobro da se i Goražde uključi u turističku ponudu (rafting Tarom), što bi svakako značilo za razvoj i unaprijeđenje turizma i Foče i Goražda, kao i da se jedan dio programskih sadržaja Internacionalnog Festivala prijateljstva izmjesti u Foču.

Načelnici Općine Foča-Ustikolina i Pale- Prača

Načelnici općina Foča-Ustikolina i Pale-Prača Zijad Kunovac i Asim Zec 21.01.2009. boravili su u prvoj zvaničnoj posjeti Općini Goražde. Ovo je ujedno bio i radni sastanak na kojem je razgovarano o daljim aktivnostima općina u Savezu općina i gradova Federacije BiH, ali i planovima i aktivnostima za naredni period.

Na sastanku su i jednoglasno usvojili prijedloge za člana Predsjedništva Skupštine u SOG FBiH, ali i predstavnike općina sa područja BPK-a Goražde za članstvo u radnim komisijama ovog saveza. Također je razgovarano i o aktuelnoj problematici na području ove tri lokalne zajednice, kao i zajedničkoj saradnji.

POSJETE NAČELNIKA

Posjeta Javnim ustanovama, udruženjima i mjesnim zajednicama

U proteklih 100 dana posjetio sam sa svojim pomoćnicima i saradnicima sve javne ustanove čiji je osnivač Općina Goražde (JKP "6 mart" JU Dom zdravlja Dr "Isak Samokovlija", SPKC "Mirsad Hurić", Dječije obdanište "Sunce", JU Apoteka "9 maj" JU Veterinarska stanica Goražde i JU Centar za kulturu Goražde), udruženja (Udruženja oboljelih od dječije cerebralne paralize i distrofije, Udruženje za pomoć mentalno retardiranim osobama, Udruženje slijepih i slabovidnih lica, Motiv, Merhamet) i svih 20 mjesnih zajednica (sastanak sa predsjednicima mjesnih zajednica, predsjednicima Savjeta i građanima). Održan je i sastanak sa predstavnicima Medžlisa IZ na kojima je razgovarano o aktivnostima Medžlisa i međusobnoj saradnji.

Cilj ovih posjeta bio je da se analizira i sagleda postojeće stanje, potrebe i prioritete u ovim ustanovama, udruženjima i mjesnim zajednicama, kao i dogovor oko narednih aktivnosti.

U ovom periodu posjetio sam sve kolektivne centre na području Općine Goražde (Belvedere, Balkan 1, Balkan 2, Balkan 3, Đački dom, Podhranjen i Splavište) a općina je ovom prilikom zajedno sa humanitarnom organizacijom "Mostovi prijateljstva" podjelila pakete sa osnovnim životnim namirnicama svim stanovnicima ovih centara. Općina planira u narednom periodu ukinuti kolektivne centre, a pomoć u tome pružit će nam i Federalno ministarstvo za izbjegla i raseljena lica, koje finansira izgradnju i rekonstrukciju 30 kuća za potrebe stanovnika kolektivnih centara.

Također sam posjetio i JU Kantonalnu bolnicu gdje sam obišao sve bolesnike i porodilje i ovom prilikom uručio im prigodne poklone.

Posjeta Načelnika opštinama Čajniče i Novo Goražde

24. i 25.02.2009. posjetio sam opštine Čajniče i Novo Goražde, gdje sam se susreo sa načelnicima Brankom Roljićem i Daliborom Neškovićem. Na sastancima je razgovarano o saradnji ovih općine, ali i zajedničkim projektima kao što je izgradnja regionalne sanitarne deponije. Naime, Opština Goražde i Čajniče također su jedne od članica regiona koje učestvuju u ovom projektu. Na sastanku je razgovarano i o projektima prema predpristupnim fondovima. Naglašena je obostrana želja za saradnjom u cilju stvaranja ambijenta za nova ulaganja i razvoj.

Prijemi i sastanci Načelnika

- Prijem u Predsjedništvu BiH povodom 25. novembra. 2008. Dana državnosti i 01. Marta 2009.- Dana nezavisnosti BiH
- Božićni prijem
- Bajramski prijem
- Prijem za penzionere
- Novogodišnji prijem
- Prijem za penzionere Općine Goražde,
- Prijem povodom pravoslavnog božića i podjela paketića za djecu povrtanika
- Prijem najboljih sportista u 2008
- Prijem povodom međunarodnog dana volontera
- Prijem za predstavnike boračkih udruženja (Savez RVI, Udruženje porodica šehida BPK-a, Savez dobitnika najvećih ratnih priznanja "Zlatni ljiljan" i Udruženje demobilisanih boraca BPK-a)
- Prijem predstavnika vjerskih zajednica (predstavnicu Islamske zajednice, Župnog ureda i Parohije Goražde)
- Održana 2 sastanka sa predstavnicima udruženja "Mala pijaca"
- Održan sastanak sa predstavnicima Sindikata JKP "6 mart" Goražde
- Održan sastanak sa predstavnicima Obrtničke komore Goražde
- Održan sastanak sa predstavnicima Udruženja "Mali zanati"
- Održan sastanak sa svim predsjednicima mjesnih zajednica
- Sastanak sa Lot timom,
- Formiran Savjet načelnika

U proteklih 100 dana pored mnogobrojnih protokolarnih aktivnosti primio sam i sve građane koji su se obraćali po raznim zahtjevima. Također sam uveo i poseban termin namijenjen isključivo građanima i to svakog petka u periodu od 8:30h - 11:30h.

Općina Goražde uputila je zvanično pismo prema svim amabasadama u Bosni i Hercegovini, sa namjerom da se uspostavi kontakt i ostvari saradnja na različitim poljima.

Mladi, kultura, sport, obrazovanje

- Projekat dodjele studentskih stipendija u 2008 / 2009 studijskoj godini (60 stipendija)
- Potpisani ugovori za projekte mladih (10 ugovora)
- Nakon održanog sastanka 30.12.2008. sa Catherine Herve, jednom od osnivača Festivala, na kojem je dogovoreno da bi Internacionalni "Festival prijateljstva" trebao da se vrati svojim izvornim vrijednostima, te da zaista bude festival prijateljstva među narodima, u januaru je organizovan sastanak u proširenom sastavu u Maloj Sali CZK na temu budućeg formalno-pravnog statusa Festivala prijateljstva i programskih sadržaja.
- Projekat organizacije Manifestacije Dani Isaka Samokovlije (januar – maj 2009.)
- Pokrovitelj izložbe slika „Mali format“ Gradska galerija
- Učešće u organizaciji obilježavanja Dana državnosti i Dana nezavisnosti BiH
- Obraćanje na protestnom skupu Stop genocidu u Palestini,
- Obraćanje na obilježavanju sjećanja na žrtve genocida 1941-1945 i 1992-1995
- Pokrovitelj Božićnog turnira u šahu

SARADNJA SA MEDIJIMA

U proteklih 100 dana ostvarena je prilično dobra saradnja sa medijima, kako printanim tako i elektronskim. Naročito dobru saradnju imali smo sa lokalnim medijima RTV BPK-a Goražde, kao i listom Glas Goražde, ali i sa FTV, BHT, Federalnim radiom, BH radiom, Dnevnim Avazom, Oslobođenjem, Nezavisnim novinama, RTRS, Večernjim novostima i dr. koji su redovno izvještavali o svim aktuelnostima u Općini Goražde. Naša je namjera i obaveza da radimo javno i transparentno, stoga ćemo i u narednom periodu nastojati da ojačamo dvosmjernu komunikaciju sa našim građanima, putem različitih medija, brošura, letaka, web stranice www.gorazde.ba, zborova građana, javnih rasprava, tribina, anketa i sl., kako bismo našim građanima omogućili da budu informirani, ali i dali priliku da sami iznesu svoje ideje, stavove i razmišljanja o svim bitnim pitanjima i procesima koji se odvijaju na području naše lokalne zajednice. Općinska stranica je uvijek ažurna i na njoj se mogu pronaći brojne informacije, a građani mogu i postavljati svoja pitanja, davati ideje i mišljenja putem mail adrese.

INVESTICIONA ULAGANJA I RAZVOJ

Kako sam već napomenuo u uvodnom izlaganju i analizi postojećeg stanja šta su uočeni nedostaci, već su poduzeti određeni koraci i krenulo se sa otklanjanjem istih. Održan je i sastanak sa predstavnicima **ASA preventa** na kojem je razgovarano o novim ulaganjima na području Općine Goražde koja će u narednom periodu svakako doprinijeti poboljšanju socio – ekonomske situacije na području naše lokalne zajednice.

Takođe je održan sastanak sa predstavnicima Privredne komore i ostvaren kontakt sa svim privrednim subjektima sa područja naše lokalne zajednice.

Pokrenuto je i pitanje mogućnosti izgradnje ženskog zatvora u Goraždu (u saradnji sa Federalnim ministarstvom pravde), koje bi rezultiralo, između ostalog, i otvaranjem novih radnih mjesta (35-50), što bi značilo upošljavanje i ulaganja u razvoj ove regije. I samo Općinsko vijeće Goražde na 4. redovnoj sjednici podržalo je ovaj projekat te dalo načelnu saglasnost za izgradnju zatvora na području Općine Goražde.

Pored ovog projekta nova upošljavanja najavljena su i sa mogućnošću izgradnje regionalne sanitarne deponije na području Općine Goražde (također 50 radnih mjesta), te smo u proteklom periodu održali niz sastanaka sa predstavnicima drugih općina iz regije na ovu temu.

Posebno treba istaknuti i saradnju koju smo ostvarili sa fondacijom "Irnis Čatić" koji su nedavno donirali vrijednu donaciju dječijem vrtiću SOS Kinderdrorf u iznosu od 20 000 KM. Prilikom te posjete dogovoreni su i novi projekti i ulaganja ove fonadacije na području Goražda, a prvi u nizu zajedničkih projekata jeste projekat obnove "Plavog cvijeta".

Da je Goražde bogato brojnim prirodnim resursima, naročito mineralima i rudama, potvrdili su na našem nedavnom zajedničkom sastanku eksperti u oblasti geodezije i geologije Enver Buza dipl.ing. geodezije - direktor Instituta za geodeziju BiH i dr Enes Ramović, dipl.ing.geologije – direktor firme GEO ETA. Inicirao sam ovaj sastanak kako bi razgovarali o prirodnim potencijalima i resursima kojima raspolaže ova općina. Prema njihovim riječima, istraživanja koja su ranije provedena u ovim krajevima, potvrdila su brojna nalazišta i prirodna bogatstva kojima ovaj kraj raspolaže, a naročito velik potencijal Goražde ima u oblasti hidropotencijala, nalazišta minerala i ruda. Istraživanja su također pokazala da se na ovom području nalaze i nalazišta gipsa, kao i automona. Kako su kazali gosp. Buza i gosp. Ramović te potencijale svakako treba koristiti, a na kraju sastanka pohvalili su inicijativu da se razgovara sa njima o ovoj temi, jer kako kažu Općina Goražde jedna je od rijetkih općina koja je osjetila da treba planirati i studiozno prilaziti iskorištavanju prirodnih bogatstava.

ZAKLJUČAK

U ovoj Informaciji istaknute su samo glavne aktivnosti i rad Načelnika u proteklih 100 dana. To je relativno kratak period za rješavanje gorućih problema (poput deponije, Male pijace, problema sa JKP "6 mart") , koji zahtjevaju duži vremenski period, ali i podršku viših nivoa vlasti i samih građana.

Međutim, isto tako u pomenutom periodu pokrenuto je niz aktivnosti i novih projekata, koji za krajnji cilj imaju nova ulaganja i zapošljavanje, a samim tim napredak i razvoj. Općina Goražde i Načelnik Općine podržat će sva nova ulaganja i investicije, stoga će naš rad biti usmjeren ka stvaranju ambijenta za nova ulaganja, a prioritetni problemi i projekti na kojima će Općina u narednom periodu raditi su:

- Pitanja lokalne i regionalne sanitarne deponije,
- Male pijace,
- Rekonstrukcija sekundarne vodovodne mreže,
- Rješavanje površinskih i otpadnih voda,
- Uređenje grada i zelenih površina,
- Sanacija i rekonstrukcija lokalnih puteva,
- Pokrivenost RTV signalom,
- Poticaj poljoprivredne proizvodnje,
- Projekti iz kulture, sporta i turizma,
- Problem slabog napajanja električnom energijom

Kapitalni projekti prema važnosti su:

- regionalna sanitarna deponija,
- vodovod "Starac"
- zaobilaznica oko grada,
- brza cesta Sarajevo-Goražde
- toplifikacija grada,

Goražde, mart 2009.

NAČELNIK OPĆINE GORAŽDE

Muhamed Ramović